



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

- Komisija za vanjsku i trgovinsku politiku –

Broj: 02/2-011-1640-7/03

Sarajevo, 03. 12. 2003. godine

**Z A P I S N I K
sa 12. sjednice Komisije za vanjsku i trgovinsku politiku
Doma naroda Parlamentarne skupštine BiH
održane 27. 11. 2003. godine**

Dvanaestu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvao je predsjedavajući Komisije Hasan Čengić.

Sjednici su prisustvovali sljedeći članovi Komisije: Hasan Čengić, Anto Spajić, Osman Brka, Velimir Jukić i Nade Radović, te Nevenka Savić, sekretar Komisije. G. Vinko Radovanović bio je opravdano odsutan.

Osim pomenutih, sjednici je prisustvovao Ismet Šečić iz Ministarstva komunikacija i prometa, u svojstvu predstavnika predlagača.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio slijedeći

DNEVNI RED

1. Usvajanje zapisnika sa 11. sjednice Komisije;
2. Saglasnost za ratifikaciju Ugovora o slobodnoj trgovini između Vijeća ministara Bosne i Hercegovine i Vlade Republike Moldove – predlagač Predsjedništvo BiH;
3. Saglasnost za ratifikaciju Međunarodne konvencije o saradnji na sigurnosti zračne plovidbe od 13. decembra 1960. godine sa izmjenama od 6. jula 1970. godine, 21. novembra 1978. godine, 12. februara 1981. godine i 27. juna 1997.

godine i Protokol od 8. oktobra 2002. godine o pristipanju Evropske zajednice “EUROCONTROLU-u” - predlagač Predsjedništvo BiH;

4. Razmatranje informacije Zajedničke službe Sekretarijata PS BiH – Pregled službenih putovanja u inostranstvo članova i delegacija Parlamentarne skupštine BiH ostvarenih u periodu od 01. 01. – 31. 10. 2003. godine;
5. Izvještaj Delegacije Doma naroda Parlamentarne skupštine BiH sa 5. zasjedanja Asocijacije evropskih senata, Prag, 6. – 8. 10. 2003. godine;
6. Izvještaj sa službenog puta; učešće u radu Makroekonomske istraživačke radne grupe u organizaciji Vijeća Evrope, 24. oktobar 2003. godine;
7. Tekuća pitanja.

Dnevni red je jednoglasno usvojen.

Ad. 1. Usvajanje zapisnika sa 11. sjednice Komisije

Zapisnik sa 11. sjednice Komisije je jednoglasno usvojen.

Ad. 2. Saglasnost za ratifikaciju Ugovora o slobodnoj trgovini između Vijeća ministara Bosne i Hercegovine i Vlade Republike Moldove – predlagač Predsjedništvo BiH

Predsjedavajući je konstatirao da nije prisutan predstavnik predlagača. Članovi Komisije, ipak, su se odlučili za prijedlog da razmatraju ovaj Ugovor. Komisija je jednoglasno usvojila ovaj Ugovor i predložila Domu naroda Parlamentarne skupštine BiH da donese odluku o davanju saglasnosti za ratifikaciju.

Ad. 3. Saglasnost za ratifikaciju Međunarodne konvencije o saradnji na sigurnosti zračne plovidbe od 13. decembra 1960. godine sa izmjenama od 6. jula 1970. godine, 21. novembra 1978. godine, 12. februara 1981. godine i 27. juna 1997. godine i Protokol od 8. oktobra 2002. godine o pristipanju Evropske zajednice “EUROCONTROLU-u” - predlagač Predsjedništvo BiH

Predstavnik predlagača, g. Šečić, iz Ministarstva komunikacija i prometa, upoznao je članove Komisije za značajem i prednostima koje Bosna i Hercegovina dobiva pristupanjem ovoj Konvenciji. To se, prije svega, odnosi na učešće u pripremi i donošenju strategije sistema kontrole i upravljanja zračnim prometom, dostupnosti savremenim tehničkom dostignućima, mogućnosti edukacije osoblja, usaglašenosti sa evropskim standardima, efikasnoj naplati preleta putem “Eurocontrol-a”, itd.

Članovi Komisije su, zatim, postavljali detaljna pitanja g. Šečiću koja su odnosila na aktivnosti naših stručnjaka u projektima “Eurocontrol-a”, princip naplate preleta, finansijske efekte pristupanja, mogućnost uticaja na definiranje zračnih putnih koridora, dobivanje ekspertne pomoći itd.

Komisija je, zatim, jednoglasno usvojila Konvenciju i Protokol i predložila Domu naroda Parlamentarne skupštine BiH da donese odluku o davanju saglasnosti za ratifikaciju uz zaključak da se na jednoj od narednih sjednica Komisije detaljnije razmotri pitanje zračne kontrole preleta preko Bosne i Hercegovine i naplaćivanja preleta.

Ad. 4. Razmatranje informacije Zajedničke službe Sekretarijata PS BiH – Pregled službenih putovanja u inostranstvo članova i delegacija Parlamentarne skupštine BiH ostvarenih u periodu od 01. 01. – 31. 10. 2003. godine

Predsjedavajući Komisije objasnio je da je Zajednička služba dostavila novu informaciju Komisiji, koja je po sadržaju sveobuhvatnija. U diskusiji povodom Informacije učestvovali su svi članovi Komisije. Iznesene su sljedeće konstatacije i mišljenja: službena putovanja doprinose afirmaciji Bosne i Hercegovine i Parlamentarne skupštine i treba da budu dio aktivnosti svakog delegata; do sada se dešavalo da se neke odluke o putovanjima ne poštuju; nije sasvim jasno ko vodi ovaj segment međunarodne saradnje i ko je odgovoran za sprovođenje odluka o službenim putovanjima; putovanja treba u što je moguće većoj mjeri planirati; opseg putovanja nije prevelik ali treba voditi računa da ona rezultiraju korisnim efektima za rad Parlamentarne skupštine BiH, te da su informacije i saznanja transparentna i dostupna; pri realizaciji službenih putovanja treba se ponašati štedljivo, u skladu sa mogućnostima; bilo bi poželjno da svaki poslanik/delegat bar jednom godišnje putuje u inostranstvo.

U cilju uspostavljanja reda i bolje koordinacije u ovoj oblasti, članovi Komisije su jednoglasno usvojili sljedeće zaključke i prijedloge koje upućuju Kolegiju Doma naroda na razmatranje:

- Konstatira se da je Pregled službenih putovanja u inostranstvo članova i delegacija PS BiH za period od 01. 01. do 31. 10. 2003. godine urađen temeljito, iako uz zakašnjenje i na insistiranje Komisije;
- Konstatira se da je broj službenih putovanja različit po domovima i pojedinačno po učešću članova Parlamentarne skupštine BiH, te se predlaže da se ubuduće vodi računa o uspostavljanju ravnomjernijeg odnosa;
- Komisija smatra da su službena putovanja sastavni dio aktivnosti Parlamentarne skupštine BiH, pa bi trebala biti uključena u strategiju i plana rada Parlamentarne skupštine BiH;

- Službena putovanja moraju biti racionalna i donositi rezultate;
- Potrebno je uspostaviti bolji nivo koordinacije između dva doma i puno usaglašavanje aktivnosti u vezi sa putovanjima i razmjenu informacija nakon realizacije putovanja;
- Predlaže se da Kolegij Doma naroda u saradnji sa Kolegijem Predstavničkog doma pripremi okvirni godišnji plan putovanja, koji će zatim biti dostavljen komisijama koje imaju u nadležnosti vanjsku politiku koje bi te planove dostavile domovima na usvajanje;
- Službena putovanja delegata i zaposlenih u Sekretarijatu odobrava samo predsjedavajući Doma, u njegovoj odsutnosti, zamjenik predsjedavajućeg. Tehničku pripremu putovanja vrše stručne službe;
- Ocjena je članova Komisije da sredstva koja su odobrena i utrošena u ovoj godini radi službenih putovanja nisu prevelika i da su dala rezultate, međutim, pošto međunarodne obaveze rastu, treba predložiti njihovo povećanje u narednoj godini;
- Tehnička lica zaposlena u Sekretarijatu ne mogu odlučivati o službenom putovanju poslanika/delegata, o tome odlučuju samo nadležna tijela Parlamentarne skupštine BiH, a već donesene odluke o putovanjima može promijeniti samo onaj ko ih je donio;
- Predlaže se članovima Komisije koji rade na izmjenama Poslovnika Doma naroda da prouče poglavlja koja se odnose na ovu problematiku i uključe i dopune Poslovnik ovim stavovima.

Ad. 5. Izvještaj Delegacije Doma naroda Parlamentarne skupštine BiH sa 5. zasjedanja Asocijacije evropskih senata, Prag, 6. – 8. 10. 2003. godine

Komisija je izvještaj primila k znanju uz zaključak da podržava aktivnosti Kolegija Doma naroda po ovom pitanju.

Ad. 6. Izvještaj sa službenog puta; učešće u radu Makroekonomske istraživačke radne grupe u organizaciji Vijeća Evrope, 24. oktobar 2003. godine

Komisija je izvještaj primila k znanju uz zaključak da sekretar Komisije pripremi dodatne informacije o aktivnostima Transparency International-a i njihovim nalazima o korupciji u Bosni i Hercegovini.

Ad. 7. Tekuća pitanja

Jednoglasno je prihvaćena inicijativa predsjedavajućeg Komisije da se na jednoj od narednih sjednica Komisije organizuje sastanak sa proizvođačima mlijeka u Bosni i Hercegovini, na kome bi se razgovaralo o problemima u mljekarskoj industriji Bosne i Hercegovine.

Predsjedavajući Komisije

Hasan Čengić